

էր, երբորդ թագաւորն Արաքացւոց Պաղտասար էր: Եւ գլուխք զօրաց նոցա՝ որք էին կարգեալք զօրապետք՝ արք երկոտասան. իսկ զօրք հեծելոցն՝ որք ընդ նոսա էին, արք թուով երկոտասան հազար յամենայն իշխանութեանէ չորս չորս հազար կարգեալ էր: Նոքա ամենեքեան հրամանաւն Աստուծոյ ի մոգուց աշխարհէն, ի կողմանէ յարեւելից բնակութիւնք նոցա, զի յորժամ հրեշտակ Տեառն աւետարանեաց ըզյղութիւնն սրբոյ Կուսին՝ զոր յառաջն ասացաք, ի նոյն ժամայն գնացեալ ազդեաց նոցա ի ձեռն Հոգւոյն սրբոյ գալ նոցա յերկրպագութիւն նորածին մանկանն: Եւ նոցա խորհուրդ առեալ ժողովեցան ի միասին, և աստեղն առաջնորդութեամբն եկեալ հասեալ նոցա զօրօք իւրեանց ի քաղաքն Երուսաղէմ՝ զամիսս ինն ճանապարհորդեալ, և իջանել նոցա շուրջ զքաղաքաւն, և կացեալ անդ զաւուրս երիս, իւրաքանչիւր ոք և թագաւորք իւրում իշխանութեան, թէպէտեւ միմեանց եղբարք էին հարազատք որդիք թագաւորի, բայց ի բազում լեզուաց զօրք եկեալ էին զկնի նոցա . . .

Եւ ահա աստղն զոր տեսին՝ առաջնորդեալ նոցա, մինչև եկեալ եկաց ի վերայ՝ ուր էր մանուկն Յիսուս: Եւ նոքա խնդութեամբ հասեալ ի քաղաքն Իեթղեհէմ, և իջեալ իւրաքանչիւր յերիվարաց իւրոց, հարին յանկարծակի զփողս իւրեանց և զծնծղայս, ըզքնարս, զտաւիղս և զերգս նուագարանաց իւրոց, ի պատիւ նորբնծայ Մանկանն որդւոյ թագաւորին Իսրայէլի . . .: Իբրև զայն ամենայն ինչ տեսեալ Յովսեփու և Մարիամու՝ երկուցեալ թագաւորացն և ի զօրացն ամենեցուն, և ահաբեկ եղեալ նոցա, մտին ի յայրն, բազմեալ կայր յանբանից մսուրն . . .: Զայս